

Uunga siunnersuut:**Aningaasarsianit akileraarutit pillugit Inatsisartut inatsisaata allanngortinneqarneranik****Inatsisartut inatsisaat**

(Akeqanngitsumik biileqarnerup, akiliunneqarluni angalanerit, akeqanngitsumik oqarasuaateqarnerit, akeqanngitsumik internetseqarneq, akeqanngitsumik nerisaqarnerup, akeqanngitsumik ineqartinneqarnerup akileraarutitigut nalinga, akileraarutini ilanngaatinik il.il. inatsimmi aalajangersaaneq, suliffeqarfiit nunani allani illersornissamut oqartussat sullillugit suliassanik suliarinnittartut Kalaallit Nunaanni akileraarutitigut angerlarsimaffeqarnissamik pisussaaffeqarnerat, transfer pricingimi uppernarsaasiinissamut piumasaaqatinik naammassinninnginnermi pineqaatissiissutit aamma ingerlatseqatigiiffiit akileraarummik akiliigallartarnerat il.il.)

Aningaasaqarnermut Nunamullu Namminermut Naalakkersuisumit saqqummiunneqartoq

pillugu**Aningaasaqarnermut Akileraartarnermullu Ataatsimiititaliap****siunnersuutip aappassaaneerseqarneranut****ILASSUTITUT ISUMALIUTISSIISUTAA**

Aningaasaqarnermut Akileraartarnermullu Ataatsimiititaliap suliarinninnermini ilaasortarai:

Inatsisartunut ilaasortaq Jens Napaattoq, Naleraq, siulittaasoq

Inatsisartunut ilaasortaq Erik Jensen, Siumut, siulittaasup tullia

Inatsisartunut ilaasortaq Hans Aronsen, Inuit Ataqtigiit

Inatsisartunut ilaasortaq Agathe Fontain, Inuit Ataqtigiit

Inatsisartunut ilaasortaq Aqqalu Jeremiassen, Atassut

Inatsisartunut ilaasortaq Vivian Motzfeldt, Siumut

Inatsisartunut ilaasortaq Jens-Frederik Nielsen, Demokraatit

Immikkoortup matuma ulloq 03.11.2021-mi aappassaaneerseqarnera atorunnaarsinneqassasoq
siunnersuullu Aningaasaqarnermut Akileraartarnermullu Ataatsimiititaliamut

innersuuteqqinneqassasoq Inatsisartut aalajangiuppaat. Taamaattumillu immikkoortoq ataatsimiititaliamit suliarineqaqqippoq.

Ilassutitut isumaliutissiissummut matumunnga tunuliaqutaasoq

Immikkoortup matuma aappassaaneerneqarnerata atorunnaarsinneqarnissaa Inatsisartut ulloq 3. november 2021-mi aalajangiuppaat. Aalajangernermit tunuliaqutaavoq Atassutip oqaaseqartartuata, partiip Aningaasaqarnermut Akileraartarnermullu Ataatsimiititaliamut ilaasortaatarisaa, aappassaaneerinninnermi oqallinneq tunngavigalugu siunnersuummut ataatsimiititaliap inassuteqarneranut isummaminik allanngortitsinera.

Ilassutitut isumaliutissiissutip matuma siuneraa

Ataatsimiititaliap inassuteqaataata paasinarsinneqarnissaa tamannalu pillugu nutaanik oqaaseqaateqarnissaq ilassutitut isumaliutissiissutip matuma siunertaraa. Siunnersuutip imarisaanut erseqqinnerusumik nassuiaatit pillugit ataatsimiititaliap aappassaaneerinninnissamat isumaliutissiissutaa 2. november 2021-meersoq ataatsimiititaliamit innersuussutigineqarpoq.

Aningaasaqarnermut Nunamullu Namminermit Naalakkersuisumit allakkat:

Aningaasaqarnermut Nunamullu Namminermit Naalakkersuisup allagai Aningaasaqarnermut Akileraartarnermullu Ataatsimiititaliamit ulloq 5. november tiguneqarput. Allakkat isumaliutissiissummut unnga ilanngussaq A-tut ilanngunneqarput.

Ataatsimiititaliap inassuteqaatai

Tamanna tunngavigalugu siunnersuut, Naalakkersuisut allannguutissatut siunnersuutaat ilanngullugit, itigartinneqassasoq ima tunngavilersuuteqarlutik ataatsimiititaliami amerlanerussuteqartut Siumumeersut, Demokraatineersut Atassummeersullu inassutigaa:

Siumut: ” Naalakkersuisooqatigiit maanna innuttaasut kaasarfi aallarfigalugit aalleqattaalersimanagerat immikkoortup uumap uppersaqqikkaa. Taamaattumik Siumumiik qineqqusaarnermi oqariartuutigisimasartik qimalluinnarsimagaat, tassalu innuttaasut kaasarfi aallerfigineqaqqissanngitsut ilumuunngitsooq uppersarparput.

Taassumap saniatigut inatsimmi maanna ilinniarsimasut kiisalu suliffimminni ingerlalluartut kalaaleqatigut pillarneqarnissaat Naalakkersuisooqatigiit ingerlatiligaat, siunissami ilinniarluaqqusinissamat qaffasissumillu inissisimalernissaannut orniginarsaataanngilluinnarpoq. Inatsimmi innuttasut 3.400 missaat akileraarnerulissapput katillugu 6 mio. koruuningajaat innuttaasut kaasarfiiniit aallertoqalerluni. Illuanilu akissaatikinnerusunut akunnattumillu isertitalinnut pitsanngorsaatini Naalakkersuisooqatigiit saqqummiussaqsaratik. Taamatutaaq suliffeqarfiutillit qaavatigut

akileraarusersuiffigineqalissapput namminersortuunermik ingerlatsinissamik kajormarunnaarsaanertut oqaatigineqarsinnaasumik. Siumumiik suliffeqarnissamut kalaaleqatittalu qaffasinnerusumik atorfinni inissisimalernissaannut orniginarsaannginneq, akileraarutitigullu pillaaniarneq akuerinngilarput. Inuit imminnut napatinnissaminnut ingerlasut kaasarfiisa mangiarneqarneri akuerisinnaannginnatsigu.”

Demokraatit: ”Demokraatit tunngaviusumik isumaqatigivaat akileraartarnermut tunngasuni inatsisit pitsaasu-ussasut pissusissamisuumngitsumillu immiut iluaqusinnginnissamut qulakkeerinnissasut. Taamaattorli inatsimmi uani Demokraatit akuerisinnaanngissaanik arlalinnik imaqarpoq.

Inatsisimut siunnersuut assigiinngittumik akileraartarnermik pilersitsissaaq (progressiv beskatning) inuiaqatigiinni suliffitsik aqqutigalugu ineqartitaagunik biileqartitaagunilluunniit akileraarnerusalissammata.

Naalackersuisut oqariartuutigaluarpaat siunertaanngittoq akileraarutit qaffanneqarneri illuatungaani aamma oqariartuutigillugu akileraarutitigut 6 mio. kr.-nik isertitsinerusalissasut aammalu oqaatigalugu naligiinnerulernermik pilersitsissasooq. Demokraatini isumaqarpugut inuiaqatigiinni akileraartarnikkut nammakkorsorneqarnerput annertuallaareersoq akuerisinnaanagulu qaffaasoqassasooq illuatungaani akileraarutit allanik appaanngikkaanni. Una siunnersuut ajorluartumik takutiinnarpaa qineqqusaarnermi neriorsuutigisimasat imaqanngittut inuiaqatigiillu kaasarfi suli aallerfiginiarneqqartut. Naalackersuisut siunnersuutit allat itigartittaqattaarpaat tunngavilersorlugulu akileraartarnermut aqqissuusseqqittoqassammat taamaattorli uani takuarput sioqqussillutik innuttaasunut ilaannut akileraarutigineqartartut qaffanniarai.”

Atassut: ”Atassutip qineqqusaarnermi progressiviusumik akileraarusersuisarnermut akerliunera pillugu oqaaserineqarsimasut attakusuppai, maannali ajorluartumik sulinermit atatillugu ajunngitsorsiaqartitaanermi akileraarusersuinikkut qaffaasoqartussanngorpoq, malittaani kr.6mio iluanaarutigineqarnerunissai naatsorsuutigineqarluni.

Kaasarfinniik aallertoqaqqissinnaanissaa iisinnaanngilarput Atassummiit, anguniakkatsinnullu assortorpoq. Aningaasaqarnermut akileraartarnermullu ataatsimiitsitaliami taamaalilluta imm. 17 tapersorsinnaanatigu nalunaaruteqarpugut.”

Ataatsimiitaliami ikinnerussuteqartut Inuit Ataqatigiinneersut Naleqqameersullu ikinnerussuteqarlutik ima oqaaseqaateqarumapput:

”Siunnersuut atorfeqarnermut suliffeqarnermullu atatillugu akeqanngitsumik ajunngitsorsiassat qanoq akileraartarnikkut naleqarnerinik akileraartarnikkut nalimmassaanermik anguniagaqarpoq.

Assersuutitut taaneqarsinnaavoq arlaqarput.

*Suliffimmi nerisaqarnermut akilitigineqartartut annikilliniarnearput. Assersuutigalugu sulisut nereqateqartarnerat 7.600 kr appaavigineqassaaq. Unalu siunnersuut **akuerineqanngippat**. sulisut kaasarfiiniit ukiumut 7.600 kr aallerfigineqassapput. Tamatutaaq pingaaruteqarpoq erseqqissassallugu perorsaasut nerisaqartitaanerisa akileraarutaasarnera allannortinneqanngimmat.*

Suliffeqarfiup akiligaanik sulinerup avataatigut akeqanngitsumik biileqarneq ukiumut skat-i suli peernagu 60.000kr-mik nalilittut akileraartarnikkut isertitatut allanneqartartup nalinga 70.000kr-mut qaffanniarneqarpoq. Tassa ukiumut qaffaat 10.000kr, imaluunniit eqqortoq oqaatigalugu 10.000kr-p 42% akileraarutitigut qaffaataavoq, tassalu suliffeqarfiup akiligaanik sulinerup avataatigut akeqanngitsumik biileqarnermut ukiumut qaffaat annertussuseqarpoq 4.200kr, imaluunniit qaammammut 350kr.

Siunnersuumi allaqqavoq. Siunnersuutit malitsigisaannik akeqanngitsumik biileqartitaanerup nalinga ukiumut 70.000 koruuninut aalajangersarneqarpoq, taamaattoq illoqarfimmi pineqartumi biilnik atuiiffiusumi aqqusernit annertussusaat 25.000 kvadratmeterit aamma 75.000 kvadratmeterit akornanni annertussuseqarpat, annertussusiliussaq 35.000 koruuninut appartinneqassalluni. Illoqarfimmi pineqartumi biilit atorneqarfiani aqqusernit annertussusaat 25.000 kvadratmeterit inorlugit annertussuseqarpat, annertussusiliussaq 17.500 koruuninut appartinneqassaaq. Aqqusernit annertussusaannik uuttortaanermi Asiaq teknikkikkut nunap assiliai tunngaviusut aallaavigineqassapput.

Erseqqissaatigissavarput suliffimmiit pisariaqavissumik biileqartitaasut soorlu qatsersartut, vvs-ni pigaartuussartut, il.il. immikkut isigineqarlutik , suliffimminiit biileqarunik akileraartitaassanngimmata.

Taamaappoq aamma akeqanngitsumik ineqarnermik, telefoneqarnermik internet-eqarnermilluunniit neqeroorfigineqarneq akuersaarsimagaanni, akeqanngitsumik tunniunneqartup nalingata akileraarutiginnissaa.

Siunnersuummi siunnersuutip ingerlatseqatigiiffinnut pitsaasumik kinguneqarnissaa illuatungiliuttut unitsinniarsarigaat uggornarpoq. Tassami ingerlatseqatigiiffiit ukiup naanissaa utaqqinagu ingerlatseqatigiiffinnut akileraarutissartik a-contorsinnaangussagaluarmassuk, taamaaliornermikkullu ukioq naappat akileraarsimanginnertik ilutigalugu pillaataasumik akileraarutissamik qaavisigut 6%-imik akileraarnissaraluartik pinngitsoortillugu. Tamannali illuatungiliuttut pinngitsoortikkusukkaat assut uggornarpoq.

Tamatumalu ilutigisaanik aamma namminersortuaqqat umiatsiaararsortullu akileraarutissaasa akilernissaanik periarfissaasa pitsanngorsaaviginiarnerigalui uani inatsisissami qulakkeerniaraluakkagut akerlilerlugit illuatungiliuttut sukataaruteqarnerat uggornarpoq. Tassami ukioq naallugu akileraarutissamik akilersinnaangornissaannik ammaassiniarneq unitsinniarpaat, tamannalu uggornarpoq.

Allaffissornikkut pisariillisaanermik anguniagaq Inuit Ataqatigiinniit Naleqqamiillu anguniarneqartoq, allaffissornerup pisariunerulernissaanik anguniagaqarluni illuatungiliuttuniit unitsinniarneqarnera uggornarpoq.”

Tamanna tunngavigalugu siunnersuut, Naalakkersuisut allannguutissatut siunnersuutaat ilanngullugit, akuerineqassasoq ataatsimiititaliami ikinnerussuteqartut siuliani taaneqartut inassutigaat.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.

Jens Napaattooq
Siulittaasoq

Erik Jensen
Siulittaasup tullia

Hans Aronsen

Agathe Fontain

Aqqalu Jerimiassen

Vivian Motzfeldt

Jens Frederik Nielsen